



IOannes in Brabantia natus est anno 1526. Is post prima literarum fundamēta feliciter in patria iacta Louanium, Lutetiam Parisiorum, & Coloniā celebriores Academias peruenit, atq; philosophię diligenter incubuit. pari ratione & Medicorū studia percurrit & didicit. Inde ingenij dexteritate fretus Theologię operam dedit, et Doctoris insignia impetrauit. In ea quoq; facultate adeò profecit, ut doctissimis Theologis & Philosophis connumerari posset. Itaq; factum ut ordinis Carmelitarum per inferiorem Germaniā Prouincialis electus fuerit, anno 1563. Est ille quadratę staturę homo, corpore robusto, & facundiā singulari præditus. Accidit

autem in mea peregrinatione 1565, cum Aschenburgi apud electorē Moguntinum essem, ut & Iohannes propter negotia eò ueniret. Itaq; cum fortè in eodem hospitiō essemus, semel atq; iterum in Philosophicis contulimus, & familiaritatem aliquam contraximus. In ea collatione sensi hunc Iohannem rara eruditione & iudicio præclaro esse conspicuum, id quod postea ab alijs uiris doctis plenius percepi: ut dignus sit, qui hoc loco reliquis eruditis Germanis adijciatur. Anon.